

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
GRAD ZAVIDOVIĆI



BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
GRAD ZAVIDOVIĆI
STRUČNA SLUŽBA GRADONAČELNIKA

Primljeno:	18-07-2024		
Org. jed.	Kl. ozna.	Red. broj	Dr. priloga
09	04	704	24

Broj: 02-04-353/24-AP-6
Datum: 17.07.2024. godine

GRADSKO VIJEĆE ZAVIDOVIĆI
n/r PREDSEDavajući GRADSKOG VIJEĆA
Admir Fojnica, prof.

PREDMET: Prijedlog Odluke o upravljanju i održavanju mezarja - groblja
na području Grada Zavidovići, dostavlja se

U prilogu akta dostavljam Vam Prijedlog Odluke o upravljanju i održavanju mezarja - groblja na području Grada Zavidovići.

Prijedlog Odluke o upravljanju i održavanju mezarja - groblja na području Grada Zavidovići sa obrazloženjem gradonačelnika, dostavljam Gradskom vijeću Zavidovići radi uvrštavanja u dnevni red sjednice Gradskog vijeća.

S poštovanjem

Dostavljeno:

1. Naslovu,
2. U spis.



GRADONAČELNIK

doc. dr. Hašim Mujanović



Broj: 02-04-353/24-AP-5
Datum: 17.07.2024. godine

Na osnovu člana 3. stava (1) tačke i) i stava (2) tačka d) i tačke d) i l) i člana 4. stava (9), (15) i (21) Zakona o komunalnim djelatnostima Zeničko-dobojskog kantona („Službene novine Zeničko-dobojskog kantona“, broj: 17/08 i 09/11) i člana 10. Privremene Statutarne Odluke Grada Zavidovići („Službeni glasnik Općine Zavidovići“, broj: 4/22), donijelo je

ODLUKU
o upravljanju i održavanju mezarja - groblja na području Grada
Zavidovići

DIO I - OSNOVNE ODREDBE

Član 1.
(Predmet Odluke)

Ovom Odlukom se uređuje način upravljanja mezarjima - grobljima u vlasništvu Grada Zavidovići, formiranje novih mezarja - groblja, uslovi uređivanja i održavanja mezarja - groblja, uslovi za ustupanje i način utvrđivanja naknade za korištenje mezarjskih - grobnih mjesta, uslovi za izgradnju nadgrobnih spomenika, prijenos posmrtnih ostataka do mezarja - groblja i održavanje mezarja - groblja u vlasništvu vjerskih zajednica, mjesnih zajednica i fizičkih lica.

Član 2.
(Pojam)

(1) Mezarje - groblje je dobro od općeg interesa i u smislu ove Odluke smatra se zemljištem koje Grad Zavidovići putem nadležne službe odredi za sahranu umrlih, kao i objekti i uređaji koji su izgrađeni na mezarju - groblju i služe za sahranu umrlih i korištenje mezarja - groblja.
(2) Mezarje - groblje iz stava (1) smatra se zemljištem koje se već koristi za sahranjivanje umrlih i to:

- a) Žigića mezarje na zemljišnim parcelama u vlasništvu Grada Zavidovići,
- b) Mezarje Flos na zemljišnim parcelama u vlasništvu Grada Zavidovići,
- c) Ostala mezarja - groblja koja Grad Zavidovići izgradi nakon stupanja na snagu ove Odluke (U daljem tekstu mezarje - groblje u upotrebi).

Član 3.
(Lokacija novih mezarja - groblja)

Lokacije novih mezarja - groblja na području Grada Zavidovići određuje se planskom dokumentacijom iz oblasti prostornog uređenja.

DIO II - IZGRADNJA, UREĐIVANJE I ODRŽAVANJE MEZARJA - GROBLJA

Član 4.

(Izgradnja, uređivanje i održavanje)

- (1) Izgradnja mezarja - groblja se vrši na način i pod uslovima utvrđenim Zakonom o prostornom uređenju i građenju Zeničko-dobojskog kantona („Službene novine Zeničko-dobojskog kantona“, broj: 17/23) i drugim propisima koji regulišu ovu oblast.
- (2) U skladu sa stavom (1) ovog člana izgradnja mezarja - groblja se vrši na prostoru koji je namijenjen kao površina za izgradnju mezarja – groblja u planskim dokumentima Grada Zavidovići.
- (3) Uređivanje, održavanje i upravljanje mezarjima - grobljima u upotrebi povjerava se JKP „Radnik“ d.o.o. Zavidovići (u daljem tekstu: JKP „Radnik“), koje je obavezno osigurati uslove minimalne tehničke i stručne osposobljenosti za obavljanje komunalnih djelatnosti održavanja mezarja - groblja u skladu s posebnim propisima.

Član 5.

(Odobrenje za građenje)

- (1) Odobrenje za izgradnju, uređenje i proširenje mezarja - groblja izdaje služba za upravu Grada Zavidovići nadležna za poslove prostornog uređenja i građenja.
- (2) U mezarju - groblju u upotrebi mogu se graditi objekti (mrtvačnice i sl.) za obavljanje ispraćaja i sahrane umrlih lica.

Član 6.

(Mezarja - groblja pod posebnom zaštitom)

Uređivanje i održavanje mezarja - groblja koja se nalaze pod posebnom zaštitom (mezarja - groblja boraca i spomen-obilježja) vrši se u skladu sa posebnim propisima.

Član 7.

(Obaveze pravnog lica)

- (1) JKP „Radnik“ dužno je izvršiti:
 - a) čišćenje mezarja - groblja i odvoženje otpadaka, starih vijenaca, pokošene trave i suvišne zemlje,
 - b) redovno košenje trave koja na slobodnim površinama i prilaznim stazama može biti visoka najviše 10 cm,
 - c) redovno okopavanje i obrezivanje drveća kao i održavanje cvijetnih gredica izvan mezarjskih - grobnih mjesta,
 - d) čišćenje i održavanje objekta na mezarju - groblju (mrtvačnice, sanitarne prostorije, ograde, putevi, rasvjeta na otvorenom prostoru kao i druge instalacije),
 - e) uklanjanje vijenaca, ikebana, buketa cvijeća, i sl. po isteku roka od 40 dana nakon sahrane,
 - f) održavanje i uređivanje mezara - grobova na zahtjev porodice umrlog ili drugih lica uz naknadu,
 - g) uklanjanje posuda sa cvijećem,
 - h) druge poslove u skladu sa ovom Odlukom.

(2) Održavanje i uređenje mezarja - groblja u upotrebi vrši se na osnovu Programa uređenja i održavanja mezarja - groblja u upotrebi koji donosi JKP „Radnik“ uz prethodnu saglasnost službe za upravu Grada Zavidovići nadležnu za komunalne poslove.

Član 8.
(Zabranjene radnje)

Na mezarjima - grobljima u upotrebi nije dozvoljeno:

- a) prljati mezare - grobove, puteve, staze, uređaje i instalacije,
- b) obavljati bilo kakvu trgovinu,
- c) vršiti prosjačenje,
- d) vršiti narušavanje reda i mira,
- e) dovoditi pse i druge životinje,
- f) napasati stoku,
- g) oštećivati mezare - grobove, spomenike, nadgrobne oznake i ostale objekte i instalacije,
- h) trgati i odnositi cvijeće,
- i) postavljati natpise, slike i reklame protivne moralnim normama,
- j) saditi voće,
- k) ulaziti vozilom u mezarje - groblje, izuzev specijalnih vozila namijenjenih za prevoz umrlih i specijalnih građevinskih vozila koja služe za izvođenje planirnih zahvata na zemljištu,
- l) vršiti druge radnje i poslove koji su suprotni postojećim propisima i ovoj Odluci.

Član 9.
(Pravila ukopa)

- (1) Mezarje - groblje u upotrebi mora biti ograđeno i održavano u urednom stanju.
- (2) Mezari - grobovi se planiraju i postavljaju na način da se za jedan mezar - grob zauzme minimalna potrebna površina za ukop.
- (3) Sahranjivanje - ukop umrlih po pravilu se vrši u redove.
- (4) Dužina, širina i dubina mezara - groba određuje se po vjerskim propisima svake vjerske zajednice.
- (5) Širina staza između redova mora biti 1,0 m.
- (6) Razmak između mezarjih - grobnih mjesta ne smije biti manji od 0,5 metara.

Član 10.
(Nadgrobni spomenici)

- (1) Mezari-grobovi se mogu spajati radi postavljanja nadgrobnog spomenika.
- (2) Spajanje mezara-grobova iz stava (1) ovog člana vrši se na osnovu saglasnosti JKP Radnik.

Član 11.
(Nadgrobni znakovi ili nišani)

- (1) Svaki mezar - grob može se obilježavati prikladnim nadgrobnim znakom u skladu sa vjerskim propisima vjerske zajednice.
- (2) Visina nišana - nadgrobnog spomenika može iznositi do 1,50 m, a širina najviše do širine mezara - groba, ili širine spojenih mezara - grobova.
- (3) Saglasnost za postavljanje ili uklanjanje nišana - nadgrobnog spomenika, odnosno zamjenu nišana - nadgrobnog spomenika ili nadgrobnog znaka daje JKP „Radnik“.

Član 12.
(Natpisi)

- (1) Tekst natpisa na nadgrobnom spomeniku mora biti napisan s pijetetom prema umrlom.
- (2) Tekst natpisa iz prethodnog stava ne smije izazivati osjećanja koja mogu uznemiriti građane.
- (3) Ukoliko tekst natpisa ne ispunjava uslove iz stava (1) i stava (2) ovog člana, lice na čiji je zahtjev takav tekst ispisan na nadgrobnom spomeniku dužan je isti ukloniti na zahtjev komunalne inspekcije.

Član 13.
(Uređivanje mezara - groba)

- (1) Mezari - grobovi, mezarne - nadgrobne oznake, nišani - nadgrobni spomenici moraju se održavati uredno.
- (2) O izgledu mezara - groba staraju se srodnici umrlih i druga zainteresovana lica, prema mjesnim običajima.
- (3) Na mezarima - grobovima se može njegoviti cvijeće ili ukrasno šibljje, odnosno mogu se postavljati posude s cvijećem u skladu s Programom iz člana 7. stav (2) ove Odluke.
- (4) Na zahtjev srodnika umrlog ili drugih zainteresovanih lica, JKP „Radnik“ može uređivati i održavati mezar - grob uz propisanu naknadu.

Član 14.
(Otklanjanje štete)

Ukoliko prilikom ukopa, postavljanja nišana - nadgrobnog spomenika, uređivanja mezara - groba ili grobnice dođe do oštećenja drugih mezara - grobova, grobnica, nadgrobni znakova i drugih uređaja na mezarju - groblju u upotrebi, lice koje je vršilo ili na čiji se su zahtjev vršili radovi dužno je otkloniti nastalo oštećenje i sve dovesti u prvobitno stanja.

Član 15.
(Vršenje zanatskih radova i usluga na grobljima - mezarjima u upotrebi)

- (1) Vršenje zanatskih radova i usluga na grobljima - mezarjima u upotrebi vršit će se u prigodno vrijeme u skladu sa Programom iz člana 7. stav (2).
 - a) Radovi na mezarju - groblju treba da se izvode tako da se do najveće mjere očuva mir i dostojanstvo mezarja - groblja.
 - b) Građevinski materijal (kamen, građa, pijesak i drugo) može se držati na mezarju - groblju samo u potrebnoj količini i za vrijeme vršenja radova, tako da se time ne ometa saobraćaj na mezarju - groblju.
 - c) U slučaju prekida radova izvođač je dužan da radilište bez odlaganja dovesti o svom trošku u prvobitno stanje.
- (2) Izvođaču radova dužan je pridržavati se odredaba ove Odluke prilikom izvođenja radova na mezarju - groblju.

DIO III – SAHRANJIVANJE - UKOP

Član 16.
(Sahranjivanje - ukop)

Sahranjivanje - ukop umrlih vrši se u mezarjima - grobljima u upotrebi u skladu sa odredbama ove Odluke, na osnovu dozvole za sahranu izdate od mrtvozorske službe.

Član 17.

(Mjesto, vrijeme i način sahranjivanja - ukopa)

- (1) Mjesto, vrijeme i način sahranjivanja - ukopa vrši se u skladu sa vjerskim propisima vjerske zajednice.
- (2) Umrli se po pravilu sahranjuje na groblju - mezarju u upotrebi koje se nalazi na području jedinice lokalne samouprave gdje je imao prebivalište.
- (3) Umrli se može sahraniti i na groblju - mezarju u upotrebi koje je on odredio za života ili koje odredi njegova porodica, odnosno lica koja su dužna da se brinu o njegovoj sahrani.

Član 18.

(Rok sahranjivanja - ukopa)

- (1) Sahranjivanje - ukop umrlog vrši se u vremenu od 24 do 48 časova od nastupanja smrti.
- (2) Izuzetno u slučaju smrti od zarazne bolesti ili ako je izvršena obdukcija umrlog, sahranjivanje - ukop se može izvršiti i prije isteka roka iz prethodnog stava uz odobrenje gradske službe nadležne za poslove sanitarne inspekcije.
- (3) U slučaju nastupanja smrti u inostranstvu, i na zahtjev porodice, sahranjivanje - ukop se može izvršiti poslije roka iz stav (1) ovog člana.

Član 19.

(Troškovi ukopa)

- (1) Troškove sahrane - ukopa umrlog snosi porodica, odnosno nasljednici umrlog.
- (2) Ako umrli nema nasljednika ukop će izvršiti JKP „Radnik“ o trošku Grada Zavidovići sredstvima planiranim u Budžetu Grada Zavidovići.

Član 20.

(Opremanje umrlog)

- (1) Opremanje umrlog se vrši prema vjerskim propisima i mjesnim običajima.
- (2) Sahranjivanje - ukop i opremanje lica umrlih od zaraznih bolesti se vrši u skladu sa posebnim propisima.

Član 21.

(Prevoz i prenos umrlog)

Prevoz i prenos umrlog u mrtvačnicu i iz mrtvačnice do mjesta ukopa vrši se u skladu sa vjerskim propisima svake vjerske zajednice i u skladu sa mjesnim običajima.

Član 22.

(Prevoz posmrtnih ostataka)

Na dan ukopa - sahrane rodbina umrlog može specijalnim vozilom ovlaštenog preduzeća registriranog za bavljenje pogrebnom djelatnošću, izvršiti prevoz posmrtnih ostataka umrlog iz mrtvačnice direktno u vjerski objekat bez formiranja povorke radi obavljanja vjerskog obreda.

Član 23.
(Vjerski obredi)

Na groblju - mezarju u upotrebi se mogu vršiti vjerski obredi koji važe i koji se primjenjuju uz nacionalnu i vjersku pripadnost umrlog u skladu sa Zakonom o slobodi vjere, pravnom položaju crkava i vjerskih zajednica u Bosni i Hercegovini („Službeni glasnik BiH“, broj: 5/04).

Član 24.
(Pogrebna povorka)

Nakon završetka pogrebnog obreda pred mrtvačnicom, odnosno vjerskog obreda pred vjerskim objektom (džamijom ili crkvom), formira se pogrebna povorka i posmrtni ostaci se prenose do mezarja - groblja u upotrebi.

Član 25.
(Pokopavanje i zatvaranje mezara - grobova)

- (1) Čim se posmrtni ostaci spuste u mezar - grob, on se mora zasuti zemljom, odnosno grobnica zatvoriti.
- (2) Pokopavanje i zatvaranje mezara - grobova vrše lica koja angažuju srodnici ili lice koje je dužno da se brine o sahrani umrlog, kao i prenos umrlog do mezara - groba ukoliko to ne vrše srodnici ili drugi građani.

Član 26.
(Određivanje mezarnog - grobnog mjesta)

- (1) Određivanje mezarnog - grobnog mjesta vrši JKP „Radnik“.
- (2) Mezar - grobno mjesto koje je dato na korištenje, upravljanje i održavanje JKP „Radnik“ može ustupiti drugom licu samo uz saglasnost porodice kojoj je odobren mezar - grobno mjesto.

Član 27.
(Visina naknade)

Visina naknade za ustupanje na korištenje mezara - grobnog mjesta iz člana 27. ove Odluke određuje JKP „Radnik“.

Član 28.
(Cjenovnik)

Naknada za vršenje pogrebnih usluga i ostalih usluga vezanih za upravljanje i održavanje mezarja - groblja u upotrebi se utvrđuje se Cjenovnikom komunalnih usluga na prijedlog davaoca komunalnih usluga.

DIO IV - EKSHUMACIJA I ISKOP POSMRTNIH OSTATAKA

Član 29. (Ekshumacija)

- (1) Iskopavanje i / ili prenos posmrtnih ostataka (ekshumacija) iz mezarja - groblja na području Grada Zavidovići iz jednog u drugo mjesto, odnosno izvan Grada Zavidovići, vrši se na osnovu odobrenja sanitarnog inspektora ili akta nadležnog organa.
- (2) O iskopu i / ili prenosu posmrtnih ostataka prethodno se obavještava Policijska stanica Zavidovići i pravno lice koje upravlja mezarjem - grobljem.

Član 30. (Iskop i prenos posmrtnih ostataka)

- (1) Iskopavanje i prenos posmrtnih ostataka u drugo mezarje - groblje vrši se na osnovu odobrenja sanitarnog inspektora ili akta nadležnog suda zavisno od razloga za vršenje iskopa i porenosa posmrtnih ostataka.
- (2) O iskopu i prenosu posmrtnih ostataka prethodno se obavještava Policijska stanica Zavidovići i pravno lice koje upravlja mezarjem - grobljem.

Član 31. (Uređenje mjesta iskopa)

- (1) Pravno ili fizičko lice koje je vršilo iskop posmrtnih ostataka dužno je mjesto iskopa dovesti u uredno stanje.
- (2) Troškove iskopavanja i prenosa posmrtnih ostataka iz prethodnog stava snosi lice ili nadležni organ koji je tražio iskopavanje i / ili prenos posmrtnih ostataka.

DIO V - NADZOR

Član 32. (Nadzor)

Nadzor nad provođenjem ove Odluke vrši Služba za upravu poljoprivrede, vodoprivrede i komunalnih poslova.

Član 33. (Inspeksijski nadzor)

Inspeksijski nadzor nad provođenjem ove Odluke vrše gradski komunalni inspektor.

DIO VI - KAZNE ODREDBE

Član 34. (Novčane kazne za pravna lica)

- (1) Novčanom kaznom u iznosu od 300,00 KM do 1.500,00 KM kaznit će se JKP „Radnik“, za radnje koje imaju obilježja prekršaja kako slijedi:
 - a) Ne vrši uređivanje i održavanje mezarja - groblja (članu 7. stav (1)),

- b) Ne donese Program uređenja i održavanja mezarja - groblja (člana 7. stav (2)),
 - c) Ne održava mezarje u urednom stanju (član 9. stav (1)),
 - d) Ustupi mezar - grobno mjesto bez saglasnosti porodice (član 27.).
- (2) Za prekršaj iz stava (1) ovog člana kaznit će se odgovorno lice u pravnom licu u iznosu 100,00 KM do 500,00 KM.

Član 35.
(Novčane kazne za fizička lica)

- (1) Novčanom kaznom u iznosu od 100,00 do 1.000,00 KM kaznit će se fizičko lice ako:
- a) Ne poštuje zabranjeno ponašanje i radnje na mezarju - groblju (član 8.),
 - b) Ne poštuje propisana pravila ukopa (član 9.),
 - c) Vršiti spajanje mezara - grobova bez saglasnosti JKP „Radnik“ (član 10.),
 - d) Obilježava mezar - grob neprikladnim spomenikom ili spomenikom nepropisnih dimenzija (član 11.),
 - e) Gradi grobnicu bez saglasnosti ili suprotno saglasnosti JKP „Radnik“ (član 12.),
 - f) Ispiše tekst na nadgobnom spomeniku koji izaziva osjećaj uznemirenosti građana (član 13.),
 - g) Ne vrši održavanje mezara - groba u urednom stanju (član 14.),
 - h) Izvrši oštećenje mezara - grobova, grobnica, nadgrobni obilježja i oštećenja drugih uređaja na mezarju – groblju (član 15.),
 - i) Vršiti zanatske radove na groblju na nepropisan način (član 16.),
 - j) Ako ne izvrši pokopavanje i zatvaranje mezara - groba (član 26.),
 - k) Vršiti eksuhmaciju bez odobrenja sanitarne inspekcije (član 30. i 31.),
 - l) Ne dovede u uredno stanje mjesto eksuhmacije (član 32.).
- (2) Za prekršaj iz stava (1) tačka a), b), e), h), i), k) i l) kaznit će se pravno lice novčanom kaznom 300,00 KM do 1.500,00 KM.
- (3) Za prekršaj iz stava (2) ovog člana kaznit će se odgovorno lice u pravnom licu u iznosu 100,00 KM do 500,00 KM.

DIO VII - PRELAZNE I ZAVRŠNE ODREDBE

Član 36.
(Upravljanje ostalim mezarjima - grobljima)

Mezarjima - grobljima u vlasništvu vjerskih zajednica, mjesnih zajednica ili fizičkih lica upravljaju i održavaju vlasnici mezarja - groblja.

Član 37.
(Evidentiranje)

Služba za upravu geodetskih, imovinskopravnih poslova i urbanizma će u saradnji sa mjesnim zajednicama i vjerskim zajednicama na području Grada Zavidovići evidentirati u katastru nekretnina sva mezarja - groblja na području Grada Zavidovići u roku od 12 mjeseci od dana stupanja na snagu ove Odluke.

Član 38.
(Finansiranje)

Za održavanje i uređenje mezarja - groblja u upotrebi obezbjeđuju se sredstva u Budžetu Grada Zavidovići.

Član 39.
(Stupanje na snagu)

Ova Odluka stupa na snagu prvog narednog dana od dana objavljivanja u „Službenom glasniku Grada Zavidovići“.

PREDSJEDAVAJUĆI
GRADSKOG VIJEĆA

Admir Fojnica, prof.

OBRAZLOŽENJE

USTAVNOPRAVNI I ZAKONSKI OSNOV ZA UVOĐENJE ODLUKE

U članu 3. stav (1) tačka j) Zakona o komunalnim djelatnostima Zeničko-dobojskog kantona („Službene novine Zeničko-dobojskog kantona“, broj: 17/08 i 09/11) propisano je da: „Komunalne djelatnosti individualne komunalne potrošnje u smilu ovog zakona su: j) Obavljanje pogrebnih poslova;“.

U članu 3. stav (2) tačka d) Zakona o komunalnim djelatnostima Zeničko-dobojskog kantona propisano je da:

„Komunalne djelatnosti zajedničke komunalne potrošnje u smislu ovog zakona su:

d) Održavanje groblja i njihove prateće infrastrukture;“.

U članu 4. stav (9) Zakona o komunalnim djelatnostima Zeničko-dobojskog kantona propisano je:

„Pod obavljanjem pogrebnih poslova podrazumijeva se preuzimanje, opremanje i prijevoz umrlog lica do mrtvačnice, odnosno groblja;“.

U članu (15.) Zakona o komunalnim djelatnostima Zeničko-dobojskog kantona propisano je:

„Pod održavanjem groblja podrazumijeva se upravljanje, održavanje i uređivanje prostora i objekata (mrtvačnica u sklopu groblja, kapela i slično) za obavljanje ispraćaja i sahrane umrlih lica;“.

U članu (21.) Zakona o komunalnim djelatnostima Zeničko-dobojskog kantona propisano je:

„Pod održavanjem pasivnih mezarluka - groblja, spomenika i spomen kosturnica i prateće infrastrukture u užem urbanom dijelu grada podrazumijeva se dovođenje istih u potpuno ravnopravan položaj sa aktivnim mezarlucima – grobljima u pogledu čišćenja, uređenja, sanacije, uklanjanja korova i rastinja, planske sadnje cvijeća i novih sadnica.“

RAZLOZI ZA UVOĐENJE ODLUKE I OBJAŠNJENJE ODABRANE POLITIKE

S obzirom na to da Zakon o grobljima i pogrebnoj djelatnosti nije donesen na federalnom, a ni kantonalnom nivou, da bi se pristupilo proceduri određivanja lokacije i izgradnji gradskog groblja potrebno je donijeti Odluku o mezarjima - grobljima i pogrebnoj djelatnosti na području Grada Zavidovići.

Ovom Odlukom se uređuje način upravljanja mezarjima - grobljima u upotrebi, izgradnja novih, uslovi uređivanja i održavanja mezarja - groblja, uslovi za ustupanje i način utvrđivanja naknade za korištenje mezarjskih - grobnih mjesta i drugo.

Na osnovu navedenog predlaže se donošenje ove Odluke.

USKLAĐENOST ODLUKE S KANTONALNIM I FEDERALNIM ZAKONODAVSTVOM

Ova Odluka usklađena je sa Zakona o komunalnim djelatnostima Zeničko-dobojskog kantona i Zakonom o prostornom uređenju i građenju.

Federalnim propisima i propisima Bosne i Hercegovine nije uređena ova oblast.

OBRAZLOŽENJE PRAVNIH RJEŠENJA U ODLUCI

U članu 2. Odluke propisana su mezarja - groblja na koje se primjenjuju odredbe iste.

Način izgradnje i formiranja novih mezarja - grobalja na području Grada Zavidovići propisan je u članu 4. Odluke. Također je istom odredbom JKP „Radnik“ d.o.o. Zavidovići povjereno upravljanje i održavanje mezarja - grobalja u vlasništvu Grada Zavidovići.

Članom 7. i 8. propisana su ovlaštenja JKP „Radnik“ d.o.o. Zavidovići u obavljanju poslova upravljanja i održavanja mezarjima - grobljima.

Usluge koje JKP „Radnik“ d.o.o. Zavidovići plaćat će se na osnovu Cjenovnika komunalnih usluga koje pruža navedeno preduzeće, što je propisano u članu 32. Prijedloga Odluke.

U članu 37. propisao je upravljanje i održavanje mezarja koja nisu u vlasništvu Grada Zavidovići.

ODREDBE ODLUKE KOJE SE MIJENJAJU

Član 1. (Predmet Odluke)

Ovom Odlukom se uređuje način upravljanja mezarjima - grobljima u vlasništvu Grada Zavidovići, formiranje novih mezarja - grobalja, uslovi uređivanja i održavanja mezarja - grobalja, uslovi za ustupanje i način utvrđivanja naknade za korištenje mezarjskih - grobnih mjesta, uslovi za izgradnju grobnica, nadgrobnih spomenika, prijenos posmrtnih ostataka do mezarja - groblja i održavanje mezarja - grobalja u vlasništvu vjerskih zajednica, mjesnih zajednica i fizičkih lica.

Član 9. (Pravila ukopa)

- (1) Mezarje - groblje u upotrebi mora biti ograđeno i održavano u urednom stanju.
- (2) Mezari - grobovi se planiraju i postavljaju na način da se za jedan mezar - grob zauzme minimalna potrebna površina za ukop.
- (3) Sahranjivanje - ukop umrlih po pravilu se vrši u redove.
- (4) Dužina mezara - groba može biti do 2,30 m, a širina do 1,0 m.
- (5) Dubina mezara - groba od površine zemlje iznosi najmanje 1,80m.
- (6) Širina staza između redova mora biti 1,0 m.
- (7) Razmak između mezarjih - grobnih mjesta ne smije biti manji od 0,5 metara.

Član 10. (Nadgrobnni spomenici)

(1) Mezari - grobovi se mogu spajati radi postavljanja nadgrobnog spomenika, odnosno izgradnje grobnice.

Član 11. (Nadgrobnni znakovi ili nišani)

- (1) Svaki mezar - grob može se obilježiti prikladnim mezarjim - nadgrobnim znakom ili nišanima - nadgrobnim spomenikom.
- (2) Visina nišana - nadgrobnog spomenika može iznositi do 1,50 m, a širina najviše do širine mezara - groba, ili širine spojenih mezara - grobova, odnosno širine izgrađene i uređene grobnice.

(3) Saglasnost za postavljanje ili uklanjanje nišana - nadgrobnog spomenika, odnosno zamjenu nišana - nadgrobnog spomenika ili nadgrobnog znakadaje JKP „Radnik“.

Član 12.
(Grobnice)

- (1) Na mezarju - groblju mogu se graditi grobnice.
- (2) Širina grobnice može iznositi maksimalno 1,10 m, a visina s nadgrobnim spomenikom do visine određene u članu 11. ove Odluke.
- (3) Saglasnost za izgradnju grobnice daje JKP „Radnik“ uz poštivanje propisa o građenju.

Član 15.
(Otklanjanje štete)

Ukoliko prilikom ukopa, postavljanja nišana - nadgrobnog spomenika, uređivanja mezara - groba ili grobnice dođe do oštećenja drugih mezara - grobova, grobnica, nišana - nadgrobnih spomenika i drugih uređaja na mezarju - groblju u upotrebi, lice koje je vršilo ili na čiji se zahtjev vršili radovi dužno je dovesti oštećenje u prvobitno stanja

Član 16.
(Vršenje zanatskih radova i usluga na grobljima - mezarjima u upotrebi)

- (1) Za vršenje zanatskih radova i usluga na grobljima - mezarjima u upotrebi vršit će se pod sljedećim uslovima:
 - a) JKP „Radnik“ može zabraniti izvođenje zanatskih radova na grobljima - mezarjima ili na njihovim pojedinim dijelovima u određene dane i vrijeme.
 - b) Radovi na mezarju - groblju treba da se izvode tako da se do najveće mjere očuva mir i dostojanstvo mezarja - groblja.
 - c) Građevinski materijal (kamen, građa, pijesak i drugo) može se držati na mezarju - groblju samo u potrebnoj količini i za vrijeme vršenja radova, tako da se time ne ometa saobraćaj na mezarju - groblju.
 - d) U slučaju prekida radova izvođač je dužan radilište bez odlaganja dovesti o svom trošku u prvobitno stanje.
- (2) Izvođač radova dužan se pridržavati odredaba ove Odluke prilikom izvođenja radova na mezarju - groblju.

Član 18.
(Mjesto, vrijeme i način sahranjivanja - ukopa)

- (1) JKP „Radnik“ u sporazumu sa porodicom umrlog ili drugim licem koje se stara o ukopu - sahrani određuje vrijeme i način sahranjivanja - ukopa.
- (2) Umrli se po pravilu sahranjuje na groblju - mezarju u upotrebi koje se nalazi na području jedinice lokalne samouprave gdje je imao prebivalište.
- (3) Umrli se može sahraniti i na groblju - mezarju u upotrebi koje je on odredio za života ili koje odredi njegova porodica, odnosno lica koja su dužna da se brinu o njegovoj sahrani.

Član 22.
(Prevoz i prenos umrlog)

(1) Prevoz i prenos umrlog u mrtvačnicu vrši se u mrtvačkom sanduku, odnosno na nosilima koja su za to posebno pravljena i koja se samo u tu svrhu koriste.

(2) Prevoz i prenos iz mrtvačnice na mjesto ukopa može se izvršiti i bez nosila tako da rodbina i prijatelji nose umrlog, u skladu sa običajima.

Član 29.
(Cjenovnik)

Naknada za vršenje pogrebnih usluga i ostalih usluga vezanih za upravljanje i održavanje mezarja-grobalja u upotrebi se utvrđuje cjenovnikom komunalnih usluga koje pruža JKP „Radnik“ d.o.o. Zavidovići.

Član 37.
(Upravljanje ostalim mezarjima - grobljima)

(1) Mezarjima - grobljima u vlasništvu vjerskih zajednica i crkve, mjesnih zajednica ili fizičkih lica upravljaju i održavaju vlasnici mezarja - grobalja.

(2) Na mezarja - groblja iz stava (1) ovog člana primjenjuju se odredbe ove Odluke kojima je propisano održavanje mezarja - grobalja i mezara - grobova.

PROVEDBENI MEHANIZMI I NAČIN OSIGURAVANJA POŠTIVANJA PRAVILA

Provođenje ove Odluke kao i nadzor nad njegovom primjenom povjeren je Službi za upravu poljoprivrede, vodoprivrede i komunalnih poslova i inspeksijski nadzor komunalnoj inspekciji.

Poslovi upravljanja i održavanja mezarja - groblja u upotrebi povjereno je JKP „Radnik“ d.o.o. Zavidovići.

OBRAZLOŽENJE FINANSIJSKIH SREDSTAVA ZA PROVOĐENJE
ODLUKE I FINANSIJSKI EFEKTI ODLUKE

Za provođenje ove Odluke potrebno je obezbijediti sredstva u Budžetu Grada Zavidovići za održavanje groblja u vlasništvu Grada Zavidovići.

OPIS KONSULTACIJA VOĐENIH U PROCESU IZRADE ODLUKE

Prilikom izrade ove Odluke konsultovani su navedeni propisi koji su i pravni osnov za donošenje Odluke.

Obradila: Adisa Pašić
(Adisa Pašić)

Kontrolisao: Izet Bašić
(Izet Bašić)



GRADONAČELNIK

doc. dr. Hašim Mujanović

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA ZAVIDOVIĆI
Služba za upravljanje poljoprivrede,
vodoprivrede i komunalnih poslova



Broj:08-19-1424/24
Dana:05.07.2024. godine

STRUČNA SLUŽBA GRADONAČELNIKA
-OVDJE-

PREDMET: Prijedlog Odluke i Izvještaj, dostavlja se

U prilogu akta dostavljamo Vam Prijedlog Odluke o upravljanju i održavanju mezarja-grobalja na području grada Zavidovići i Izvještaj o provedenoj javnoj raspravi po Nacrtu Odluke o upravljanju i održavanju mezarja-groblja na području Grada Zavidovići, na razmatranje i dalju proceduru.

S poštovanjem

Dostavljeno:

1. Naslovu,
2. U spis.



POMOĆNIK GRADONAČELNIKA

Izer Bašić, dipl.ing.agr.

Obradila: (Pašić Adisa, dipl.pravnik)

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
GRAD ZAVIDOVIĆI
**Služba za upravljanje poljoprivrede,
vodoprivrede i komunalnih poslova**



Broj:08-19-1424/24
Dana:05.07.2024. godine

GRADONAČELNIK
STRUČNA SLUŽBA GRADSKOG VIJEĆA
- O V D J E -

PREDMET: Izvještaj o provedenoj javnoj raspravi po Nacrtu Odluke o upravljanju i održavanju mezarja-groblja na području Grada Zavidovići, dostavlja se

Gradsko vijeće Zavidovići na 23. sjednici održanoj dana 28.03.2024. godine, razmatralo je Nacrt Odluke o upravljanju i održavanju mezarja-groblja na području Grada Zavidovići.

Nakon razmatranja predmetnog Nacrta Gradsko vijeće Zavidovići donijelo je Zaključak broj:01-04-714/24-AP-7 od 28.03.2024. godine kojim prihvata Nacrt Odluke o upravljanju i održavanju mezarja-groblja na području Grada Zavidovići.

Navedenim Zaključkom Gradsko vijeće Zavidovići zadužilo je Službu za upravljanje poljoprivrede, vodoprivrede i komunalnih poslova da u periodu od 30 dana organizuje provođenje javne rasprave.

Javna rasprava, po navedenom Nacrtu Odluke, provedena je tako što je isti dostavljen svim zainteresiranim fizičkim i pravnim licima, na području Grada Zavidovići. Također, 18.04.2024. godine, održana je javna rasprava u velikoj sali Grada Zavidovići.

Na adresu Grada Zavidovići, dostavljeni su pismeni prijedlozi na Nacrt Odluke i to prijedlog JKP „Radnik“ d.o.o. Zavidovići.

I

STAVOVI PO PRIMJEDBAMA , PRIJEDLOZIMA I MIŠLJENJIMA IZNESENIM NA RASPRAVI SA 23. SJEDNICE GRADSKOG VIJEĆA ODRŽANE DANA 28.03.2024. GODINE.

Diskutant Zahid Avdičević - vijećnik Gradskog vijeća

1. Prijedlog Zahida Avdičevića da se sva greblja koja su u vlasništvu mjesne zajednice, drugih pravnih lica ili grupe građana prenesu u vlasništvu vjerskih zajednica ne prihvata se jer se predmetnom Odlukom ne reguliše pitanje prenosa vlasništva nego uređivanje i održavanje mezarja-groblja na područji grada Zavidovići.

Diskutant Refik Čatić - vijećnik Gradskog vijeća

1. Prijedlog Refika Čatića da se sva greblja koja su u vlasništvu mjesne zajednice, drugih pravnih lica ili grupe građana prenesu u vlasništvu vjerskih zajednica ne prihvata se jer se predmetnom Odlukom ne reguliše pitanje prenosa vlasništva nego uređivanje i održavanje mezarja-groblja na područji grada Zavidovići.

Diskutant Samir Skejić - vijećnik Gradskog vijeća

Diskutant Samir Skejić nije imao konkretne primjedbe samo je skrenuo pažnju da se počne rješavati problem mezarja „Flos“ kad je u pitanju podvodno tlo, kad je u pitanju rješavanje grobnih mjesta i održavanje greblja jer se na greblju gaji po staklu, buketima cvijeća itd.

STAVOVI PO PRIMJEDBAMA, PRIJEDLOZIMA I MIŠLJENJIMA SA JAVNE RASPRAVE ODRŽANE DANA 18.04.2024. GODINE:

Učešće u javnoj raspravi po Nacrtu Odluke o upravljanju i održavanju mezarja-groblja na području Grada Zavidovići uzeo je glavni imam Izet Čamdžić, Amer Halilović direktor JKP „Radnik“ d.o.o. Zavidovići i Mehić Elvir.

Diskutant Izet Čamdžić

1. Primjedba da se predmetna Odluka ne treba baviti obrednim stvarima, već samo upravljanjem i održavanjem, prihvata se.
2. Primjedba je da komunalno preduzeće treba da se bavi održavanjem mezarja/greblja uz naknadu ali se postavlja pitanje kako naplatiti tu naknadu, prihvata se a naplata usluge će se regulisati na osnovu Cjenovnika komunalnih usluga.
3. Primjedba na član 9. predmetne Odluke da se ispravi propisana pravila ukopa i usklade sa vjerskim propisima kao i da se odredi mjesto za ukop ateista – prihvata se.
4. Primjedba na član 14. da Grad Zavidovići treba preuzeti odgovornost za iznalaženje načina naplate naknade za održavanje mezarja/groblja, prihvata se, naplata za uređivanje i održavanje mezara-groba na zahtjev srodnika će biti regulisana Cjenovnikom komunalnih usluga koji se donosi na osnovu prijedloga JKP „Radnik“ d.o.o. Zavidovići.
5. Primjedba na član 18. da se komunalno preduzeće ne može baviti obrednim stvarima te dogovarati sa strankom vrijeme i način održavanja dženaze/sahrane, prihvata se.
6. Primjedba da se briše odredba člana 22. jer se prevoz i prenos umrlih vrše na razne načine zavisno od situacije i ovo je ozbiljno pitanje jer se nekad vrši prevoz u u mrtvačkom sanduku, odnosno na nosilima koja su za to posebno pravljena i samo se u te svrhe koriste, a najčešće se prenos umrlog vrši na tabutu, prihvata se.
7. Primjedba koja se odnosi na član 37. stav 2. Odluke prihvata se jer su stav 1. i stav 2. kontradiktorni. Naime, iz stava 2. proizilazi da se sve odredbe ove Odluke primjenjuju i na groblja koja su u vlasništvu mjesnih zajednica, vjerskih zajednica i crkve i fizičkih lica iako je stavom 1. ove Odluke propisano da mezarjima/grobljima u vlasništvu vjerskih zajednica i crkve, mjesnih zajednica ili fizičkih lica upravljaju i održavaju vlasnici istih. Mezarja su vlasništvo džemata i oni se brinu o njemu.

Diskutant Direktor JKP „Radnik“ d.o.o. Zavidovići, Amer Halilović, iznio je sljedeće primjedbe: Protivio se Odluci u cijelosti, rekao da je aposlutno nepovoljna za komunalno preduzeće te istakao da će dostaviti pismene primjedbe

Diskutant: Elvir Mehić

1. Primjedba je da se Odluka može primijeniti samo na kopanje, održavanje, uređenje, čišćenje greblja u vlasništvu Grada, da ista nije primjenjiva na mezarja koja su u vlasništvu Islamske zajednice, jer Islamska zajednica želi zaštititi vjerska prava muslimana po kojima se strogo vodi računa o umrlom, načinu preuzimanja, opremanja, donos do kabura i ostalo – po vjerskim propisima. Zahtijeva se korigovanje Odluke – kopanje, održavanje, uređenje, čišćenje greblja u vlasništvu Grada, da se samo na taj dio odnosi, da se ostavi pravo svim vjerskim zajednicama da od momenta smrti do ukopa obavi sve u skladu sa vlastitim propisima – prihvata se.

III

STAVOVI PO PISMENIM PRIJEDLOZIMA DOSTAVLJENIM U ROKU ZA JAVNU RASPRAVU PO NACRTU PREDMETNE ODLUKE

Pismene prijedlozi JKP „Radnik“ d.o.o. Zavidovići.

1. Primjedba JKP „Radnik“ d.o.o. Zavidovići da se upravljanje i održavanje povjeri vjerskim zajednicama, jer bi to bilo najpovoljnije rješenje za JKP „Radnik“ d.o.o. Zavidovići ne prihvata se jer je odredbom člana 9. Zakona o komunalnim djelatnostima Zeničko-dobojskog kantona propisano da Općina obavljanje pojedinih komunalnih djelatnosti koje se finansiraju iz njenog budžeta obavezno povjerava javnim preduzećima komunalnih djelatnosti koje je odlukama općinskog vijeća formirala za obavljanje komunalnih djelatnosti.

2. Prijmjedba JKP „Radnik“ d.o.o. Zavidovići da je Zakonom o komunalnim djelatnostima definisano da se aktivna mezarja finansiraju iz individualne komunalne potrošnje, dok se pasivna finansiraju iz sredstava zajedničke komunalne potrošnje, što znači iz budžeta ne prihvata se jer su pogrešno tumačene zakonske odredbe. Naime zakonom je propisano da se komunalna djelatnost - obavljanje pogrebnih poslova finansira iz sredstava individualne komunalne potrošnje, a održavanje grobalja i njihove prateće infrastrukture kao i održavanje pasivnih mezarluka grobalja, spomenika, spomen kosturnica i prateće infrastrukture u užem urbanom dijelu grada finansira iz sredstava zajedničke komunalne potrošnje.

3. Primjedba JKP „RADNIK“ d.o.o. Zavidovići da je član 7. predmetne Odluke općenito cjelokupan neprovodiv bez dodatnog zapošljavanja radnika za koje nisu obezbjeđena finansijska sredstva za plaće, doprinose, topli obrok, prijevoz, regres itd., neutemeljena je obzirom da će JKP „Radnik“ d.o.o. Zavidovići za izvršenu komunalnu djelatnost obebjediti finansijska sredstva, zavisno od vrste djelatnosti, ili od korisnika individualne komunalne djelatnosti ili iz budžeta Grada Zavidovići.


4. Primjedba da je član 8. Odluke u potpunosti ne provodiv od strane komunalnog preduzeća, jer JKP „Radnik“ d.o.o. Zavidovići nije dužno vršiti nadzor nad zabranjenim radnjama iz člana 8. također je neutemeljena i pogršno tumačena jer je odredbom člana 33. propisano da nadzor vrše nadležne inspekcije

5. Primjedba da se mezar ne kopa u dubunu od 1,8 m (tj. 180 cm), prihvata se
6. Primjedba da član 10. i član 12. nisu u skladu sa muslimanskom tradicijom jer ista ne poznaje izgradnju ni spomenika niti grobnica, a pogotovo za to ne treba da sagasnost izdaje komunalno preduzeće već nadležni organ Grada Zavidovići, prihvata se.
7. Primjedba na član 16 opet prijedlog da komunalno preduzeće bude inspeksijski organ a ne onaj koji pruža komunalne usluge. Poslovima iz ovog člana se bave inspekcije jer su za to osnovane, prihvata se.
8. Primjedba na član 18 : „Po našem shvatanju ovdje se komunalno preduzeće uvodi u rješavanje ukopa svakog umrlog na području grada jer se spominje područje lokalne samouprave gdje je imao prebivalište, tako se onda po ovome članu može desiti da je komunalno nadležno za određivanje mjesta, vremena i načina ukopa na bilo kojem mezarju na području grada. Ukoliko se nešto daje na upravljanje komunalnom preduzeću onda to komunalno preduzeće određuje sve, a ne da se za života može odrediti gdje će se ukopati a nije plaća cijeli život ništa. Način na koji je definisam ovaj član daje mogućnost da komunalno preduzeće odredi termin ukopa u bilo koje doba (npr. oko 10 sati što nije naša tradicija a ni praksa), a ukoliko se budemo pridržavali tradicije i dosadašnje prakse termini ukopa su izvan radnog vremena što nama predstavlja dodatno finansijsko opterećenje jer onda moramo radnicima i ostalom angažovanom osoblju plaćati prekovremene sate. Opet je i ovaj član neprovodiv“, prihvata se.
9. Primjedba da član 20 definiše troškove ukopa, te za one koji nemaju nasljednika da će za te umrle troška snositi Grad Zavidovići, a sredstava nema planiranih u budžetu što znači da je potreban rebalans budžeta, prihvata se .
10. Primjedba da su članovi 28. i 29. su u najmanju ruku kontradiktorniji jer definišu da u jednom članu naknadu određuje JKP "Radnik", a u drugom da se vršenje pogrebnih i ostalih usluga utvrđuje cjenovnikom, a mi znamo da cjenovnik donosi Gradsko vijeće i znamo kakva je sudbina dosadašnjeg cjenovnika ne prihvata se jer predmetne odredbe nisu kontradiktorne. Naime, visina naknade korištenja mezara-grobnog mjesta mora biti propisana Cjenovnikom a na prijedlog JKP „Radnik“ kao davaoca komunalne usluge, a što se tiče posljedica ne usvajanja cjenovnika Zakonom o komunalnim djelatnostima je propisano da ukoliko Općinsko vijeće utvrdi nižu cijenu korištenja od ekonomske cijene korištenja ili je ne usaglašava sa rastom cijena, onda je isti organ davaocu komunalnih usluga obavezan nadoknaditi razliku sredstava.
11. Primjedba da član 37. ima dva stava koja su sama sebi kontradiktorna jer se prvim stavom definiše jedno a drugim stavom je definisano da se ova Odluka odnosi na sva mezarja, pa bi to u prevodu značilo da je komunalno preduzeće nadležno i zaduženo za sva mezarja i groblja u Gradu Zavidovići, prihvata se .
12. Primjedba da je ova Odluka u potpunosti neprovodiva te da istu ne treba prihvatiti, jer ista nije sagledala sve aspekte donošenja ove Odluke i stanje u koje se može dovesti komunalno preduzeće, ne prihvata se jer nisu tačni navodi podnosioca primjedbe da nisu sagledani svi aspekti donošenja ove Odluke.
13. Primjedba da se ovaj problem treba riješiti u skladu sa Zakonom o komunalniom djelatnostima ZDK, te prijedlog da se za upravljanje i održavanje mezarja oformi novo preduzeće koje će nositi naziv JKP "Gradska groblja" Zavidovići kao što je to slučaj u

Visokom, Zenici, Sarajevu i drugim gradovima, ili da se ostavi vjerskim zajednicama, ne prihvata se jer bi vršenjem navedenih komunalnih djelatnosti JKP „Radnik“ moglo obezbijediti dodatna finansijska sredstva za bolje funkcionisanje.

14. Primjedba da se odrediti nova lokacija za mezarje gdje treba voditi računa da odredi parcela za ukopavanje ateista, privata se.

Obradila:
Pašić Adisa



POMOĆNIK GRADONAČELNIKA

Basic Izet dipl.ing agr.



Komisija za Statut i propise

Broj: 01-04-714/24-AP-11

Datum: 22.07.2024. godine

Na osnovu člana 16. i 17. Privremene Statutarne Odluke Grada Zavidovići („Službeni glasnik Općine Zavidovići“, broj: 4/2022) i člana 33. i 44. Poslovnika o radu Gradskog vijeća Zavidovići - novi prečišćeni tekst („Službeni glasnik Grada Zavidovići“, broj: 7/22 i 1/23), Komisija za Statut i propise na 53. sjednici održanoj dana 22.07.2024. godine, razmatrala je Prijedlog Odluke o upravljanju i održavanju mezarja - groblja na području Grada Zavidovići sa Izvještajem o provedenoj javnoj raspravi, pa nakon rasprave donijela

ZAKLJUČAK

1. Komisija za Statut i propise smatra da je Prijedlog Odluke o upravljanju i održavanju mezarja - groblja na području Grada Zavidovići sa Izvještajem o provedenoj javnoj raspravi, u skladu sa zakonom i drugim propisima.

2. Komisija za Statut i propise podnosi Amandman na Prijedlog Odluke o upravljanju i održavanju mezarja - groblja na području Grada Zavidovići sa Izvještajem o provedenoj javnoj raspravi, koji glasi:

A M A N D M A N

Članu 39. Prijedlog Odluke o upravljanju i održavanju mezarja - groblja na području Grada Zavidovići, zamjenjuje se i glasi: „Ova odluka stupa na snagu osmog dana od dana objavljivanja u „Službenom glasniku Grada Zavidovići“, a primjenjivat će se od dana utvrđivanja naknada Cjenovnikom komunalnih usluga po predmetnoj Odluci.“

3. Komisija za Statut i propise predleže ovlaštenom predlagraču da se izvrši usaglašavanje teksta člana 2. Prijedlog Odluke o upravljanju i održavanju mezarja - groblja na području Grada Zavidović, na način da se tekst koji glasi: „(U daljem tekstu mezarja – groblja u upotrebi)“ briše u tački c) i da se doda u stavu (2) iza riječi „umrlih“, tako da bi stav (2) člana 2. glasio: „(2) Mezarja – groblja iz stava (1) smatra se zemljištem koje se već koristi za sahranjivanje umrlih (u daljem tekstu mezarja – groblja u upotrebi) i to:

a) Žigića mezarje na zemljišnim parcelama u vlasništvu Grada Zavidovići,

b) Mezarje Flos na zemljišnim parcelama u vlasništvu Grada Zavidovići.“

Tačka c) postaje novi stav 3. i glasi: „Mezarje – groblje iz stava (1) smatra se zemljište koja Grad Zavidovići izgradi nakon stupanja na snagu ove Odluke (u daljem tekstu ostala mezarja – groblja).“

4. Komisija za Statut i propise predleže ovlaštenom predlagraču da se izvrši usaglašavanje teksta člana 24. Prijedlog Odluke o upravljanju i održavanju mezarja - groblja na području Grada Zavidović, na način da se riječi u zagradi „(džamijom ili crkvom)“ brišu.

5. Komisija za Statut i propise predleže ovlaštenom predlagraču da se izvrši usaglašavanje teksta člana 27. i 28. Prijedlog Odluke o upravljanju i održavanju mezarja - groblja na području Grada Zavidović, imajući u vidu nadležnosti u donošenju Cjenovnika

komunalnih usluga, te ispraviti broj člana upisan u članu 27., upisan je „član 27.“, a treba da stoji „član 26.“.

6. Komisija za Statut i propise smatra da je Prijedlog Odluke o upravljanju i održavanju mezarja - groblja na području Grada Zavidovići sa Izvještajem o provedenoj javnoj raspravi, pripremljen u skladu sa članom 3. stav (1) tačka i) i stav (2) tačka d) i l) i članom 4. stav (1), (9), (15) i (21) Zakona o komunalnim djelatnostima („Službene novine Zeničko-dobojskog kantona“, broj: 17/08 i 09/11) i članom 10. Privremene Statutarne Odluke Grada Zavidovići („Službeni glasnik Općine Zavidovići“, broj: 4/2022).

7. Komisija za Statut i propise smatra da je Prijedlog Odluke o upravljanju i održavanju mezarja - groblja na području Grada Zavidovići sa Izvještajem o provedenoj javnoj raspravi, pripremljen u skladu sa Jedinstvenim pravilima za izradu pravnih propisa u Zeničko-dobojskom kantonu („Službene novine Zeničko-dobojskog kantona“, broj: 5/08).

8. Prijedlog Odluke o upravljanju i održavanju mezarja - groblja na području Grada Zavidovići sa Izvještajem o provedenoj javnoj raspravi, dostavlja se predsjedavajućem radi uvrštavanja u dnevni red sjednice Gradskog vijeća.

9. O realizaciji ovog Zaključka starat će se Stručna služba Gradskog vijeća.



PREDSJEDNIK KOMISIJE

Amela Mačak, dipl. pravnik

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
GRAD ZAVIDOVIĆI
GRADSKO VIJEĆE



**Komisija za prostorno planiranje,
uređenje i ekologiju**

Broj: 01-04-714/24-AP-13

Datum: 23.07.2024. godine

Na osnovu člana 16. i 17. Privremene Statutarne Odluke Grada Zavidovići („Službeni glasnik Općine Zavidovići“, broj: 4/2022) i člana 33. i 49. Poslovnika o radu Gradskog vijeća Zavidovići - novi prečišćeni tekst („Službeni glasnik grada Zavidovići“, broj: 7/22), Komisija za prostorno planiranje, uređenje i ekologiju na 27. sjednici održanoj dans 23.07.2024. godine, razmatrala je Prijedlog Odluke o upravljanju i održavanju mezarja – groblja na području Grada Zavidovići, sa Izvještajem o provedenoj javnoj raspravi, pa nakon rasprave donijela

ZAKLJUČAK

1. Komisija za prostorno planiranje, uređenje i ekologiju prihvata Prijedlog Odluke o upravljanju i održavanju mezarja – groblja na području Grada Zavidovići, sa Izvještajem o provedenoj javnoj raspravi.
2. Prijedlog Odluke o upravljanju i održavanju mezarja – groblja na području Grada Zavidovići, sa Izvještajem o provedenoj javnoj raspravi dostavlja se predsjedavajućem radi uvrštavanja u dnevni red sjednice Gradskog vijeća.
3. O realizaciji ovog Zaključka starat će se Stručna služba Gradskog vijeća.

PREDSJEDNIK KOMISIJE

Sead Salkičević, Bsc. Hortikulture dipl. ing. šumarstva





**Komisija za budžet, finansije i
ekonomska pitanja**

Broj: 01-04-714/24-AP-14

Datum: 23.07.2024. godine

Na osnovu člana 13., 17. i 18. Privremene Statutarne Odluke Grada Zavidovići („Službeni glasnik Općine Zavidovići“, broj: 4/2022), člana 33. i 45. Poslovnika o radu Gradskog vijeća Zavidovići – prečišćeni tekst („Službeni glasnik Grada Zavidovići“, broj: 7/22 i 1/23), Komisija za budžet, finansije i ekonomska pitanja na 23. sjednici održanoj dana 23.07.2024. godine, razmatrala je Prijedlog Odluke o upravljanju i održavanju mezarja - groblja na području Grada Zavidovići, sa Izvještajem o provedenoj javnoj raspravi, pa nakon rasprave donijela

ZAKLJUČAK

1. Komisija za budžet, finansije i ekonomska pitanja prihvata Prijedlog Odluke o upravljanju i održavanju mezarja – groblja na području Grada Zavidovići, sa Izvještajem o provedenoj javnoj raspravi.
2. Prijedlog Odluke o upravljanju i održavanju mezarja - groblja na području Grada Zavidovići, sa Izvještajem o provedenoj javnoj raspravi, dostavlja se predsjedavajućem radi uvrštavanja u dnevni red sjednice Gradskog vijeća.
3. O realizaciji ovog Zaključka starat će se Stručna služba Gradskog vijeća.

PREDSJEDNIK KOMISIJE

Amir Alić, magistar matematike i informatike



BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
GRAD ZAVIDOVIĆI
GRADSKO VIJEĆE



**Komisija za društvene djelatnosti,
ljudska prava, mlade i
ravnopravnost spolova**

Broj: 01-04-714/24-AP-12

Datum: 22.07.2024. godine

Na osnovu člana 13., 17. i 18. Privremene Statutarne Odluke Grada Zavidovići („Službeni glasnik Općine Zavidovići“, broj: 4/2022), člana 33. i 47. Poslovnika o radu Gradskog vijeća Zavidovići – novi prečišćeni tekst („Službeni glasnik Grada Zavidovići“, broj: 7/22 i 1/23), Komisija za društvene djelatnosti, ljudska prava, mlade i ravnopravnost spolova na 26. sjednici održanoj dana 22.07.2024. godine, razmatrala je Prijedlog Odluke o upravljanju i održavanju mezarja – groblja na području Grada Zavidovići, sa Izvještajem o provedenoj javnoj rasparavi, pa nakon rasprave donijela

ZAKLJUČAK

1. Komisija za društvene djelatnosti, ljudska prava, mlade i ravnopravnost spolova prihvata Prijedlog Odluke o upravljanju i održavanju mezarja – groblja na području Grada Zavidovići, sa Izvještajem o provedenoj javnoj rasparavi.
2. Prijedlog Odluke o upravljanju i održavanju mezarja – groblja na području Grada Zavidovići, sa Izvještajem o provedenoj javnoj rasparavi, dostavlja se predsjedavajućem radi uvrštavanja u dnevni red sjednice Gradskog vijeća.
3. O realizaciji ovog Zaključka starat će se Stručna služba Gradskog vijeća.

PREDSJEDNIK KOMISIJE

